



UNIVERSITÄTS-
BIBLIOTHEK
PADERBORN

Vitæ Pontificum Romanorum

Ex Antiquis Monumentis Collectæ

Sandini, Antonio

Bambergæ, 1753

CCXV. Innocentius VIII. Anno Christi 1484. Federici III. Imperatoris 45.

[urn:nbn:de:hbz:466:1-65477](https://nbn-resolving.org/urn:nbn:de:hbz:466:1-65477)

CCXV.
INNOCENTIUS
VIII.

ANNO CHRISTI 1484.

FEDERICI III. IMPERATORIS

45.

ANte diem IV. Kal. Septembr. anno 1484. Ecclesiæ Catholicæ administrandæ præfectus est *Joannes Baptista Cibo* Genuensis, appellatusque *Innocentius VIII.* Magnum fuit studium ejus curaque de pace inter Christianos Principes concilianda, ut eos in Turcarum perniciem armaret. Confirmavit jura in Guineam, aliasque terras Saracenorum concessa Regi Lusitano à Nicolao V. Callisto III. & Paulo IV. consensit, Maximilianum Federici III. Cæsaris filium à Septemviris creari Regem Romanorum. Varias adversus maleficos &

Rayn. an.
 1484 §. 40
 43. 60. §. 1.
 Spond.
 §. 5. 6.

hæreticos edidit constitutiones: ipsaque annitente *extincta sensim est Hussitarum hæresis, donec Lutherus eam hydra pluribus horrentem capitibus in Christianorum exitium suscitavit.* (1) Idem dicitur *Catholici* titulo decorasse Fer-

Rayn. an.
 1486. §.
 42. 58.
 Spond.
 §. 1.

Iii 3

dinan-

Rayn. an. 1492. §. 14. 15. 19. 22. Spond. §. 19.

dinandum V. Aragoniæ & Castellæ Regem, qui Granatâ Urbepotitus, deleverat vetustissimum Maurorum imperium in Hispania. (2) Idemque permisisse Norvegiis sinè vino sacrum facere, falsò traditur. (3) Hujus tempore inventus Romæ in Basilica S. Crucis, dum reficeretur, Crucis Christi Domini Titulus. Præterea partem Lanceæ, quâ confossus Christi latus, dono dedit Innocentio Orator *Bajazethis* Turcarum Imperatoris, spongiam itèm & cannam passione Salvatoris consecratas. (4) Mortuus est anno 1492. VIII. Kal. Augusti. Vixit annos sexaginta, regnavit septem, cum mensibus decem, diebus septem & viginti, novi Orbis, ut habet ejus elogium, suo ævo inventi gloria. (5)

ANNOTATIONES.

(1) Raynaldus ad an. 1486. §. 58.

(2) Post annos, quàm eò venerant, 730. Petavius Rationarii Temporum part. 1. lib. 9. cap. 9.

Spondanus ad an. 1492. §. 2. *Ferdinando & Isabellæ Regibus post Granatæ expugnationem titulum Catholici ab Innocentio tributum fuisse, sunt qui asserant. Quòd ita esset*

esset etiam consequentibus Hispaniæ Regibus proprium hæreditariumque, Alexandrum VI. Innocentii successorem, hominem Hispanum concessisse, alii tradunt; aliique Ferdinandum à Julio II. id enixis precibus impetrasse. Olim illud Reccaredo Regi, ob reductam secum gentem suam Gothicam ab Arianismo ad fidem Catholicam, in Episcoporum Concilio à Patribus acclamatum fuisse, constat, & centum ferme quinquaginta post annis ab Alphonso ejus nominis Primo pro cognomine usurpatum jam aliàs vidimus.

(3) A Raphaële Volaterrano lib. 7. Geographiæ pag. 80. Norvegiæ Innocentii VIII. Pontificis concessione permissam sine vino calicem sacrificare, quod ob immensa frigora vinum in ea regione importatum acescat. Cardinalis Lambertinus De Serv. Dei Beatif. & Beat. Canoniz. lib. 2. cap. 31. num. 2. Id tamen tanquam fabulosum ab aliis rejicitur, cum in Norvegia vinum facile conservetur, & sit usu receptum, ut animadvertunt Cardinalis de Lugo De Sacramento Eucharistiæ disput. 19. sect. 8. Natalis Alexander in Theologia Dogmatica & Morali lib. 2. De Sacramento Eucharistiæ art. 3. in Confectariis proxim spectantibus regul. 3. & Miglioruccius instit. Canon. lib. 2. tit. 6. in Explicationibus n. 44.

Præterea ut animadvertit memoratus Natalis Alexander in Hist. Eccl. Sæc. XV. & XVI. cap. 1. art. 10. *nullum* Innocentii VIII. *ea de re decretum exstat, nec ulla apud alios auctores memoria.* Illud fortasse simile veri sit, quod Gonetus in Glypeo Theologia Thomist. tom. 5. disput. 3. De Eucharist. art. 6. §. 2. n. 91. scribit ex Bzovio ad annum 1490. circa illud tempus nonnullos Sacerdotes, qui postea combusti sunt propter falsificata diplomata Pontificia, potuisse in illis partibus falsam aliquam dispensationem publicare. Vide Dianam Coordinatum tom. 3. tract. 1. Resol. 47. & annotat. 4. ad Alexandrum VI.

(4) Vide Historiam nostram Familiae Saceræ *De Christo Domino* cap. 15.

^a (5) A Christophoro Columbo Genuensi anno 1492. & *Americæ* nomine appellati ab Americo Vesputio Florentino, qui sub auspiciis Emmanuelis Regis Lusitanorum anno 1497. profectus à Gadibus, primus ex Europæis in ejus continentem ingressus est.

